


薩遮尼乾子受記經

才四

百五十大四

48278



元祿九年丙子二月日重脩

皇圖鞏固 帝階綴昌

佛日增輝 懋輪常轉

山城州天安寺法金剛院置



薩遮尼乾子受記經卷第四

大 徐昇

元魏三藏

菩提留支譯

王論品第五之二

王言大師於何時中諸小王等行王論法荅
言大王於末世時轉輪聖王隱沒不現正法
不行邪法競興衆生心惡起三種過一者樂
於非法貪心二者起於顛倒貪心三者邪法
羅網纏心彼諸小王自無智慧退失
故聖人說諸小王治國論法爲行正法護世
衆生王言大師云何名爲樂於非法貪心荅
言大王於十不善惡業道中生於樂心是名
樂於非法貪心云何名爲顛倒貪心自己手

明解是

力得諸資生依時節得依正法得依如法得
不生足心更求他財如是名爲顛倒貪心王
言大師云何名爲邪法羅網之所纏心荅言
大王於諸外道非義論中起義論想於無益
論生利益想於非法中生是法想於末世時
非是智者所作論中以爲正論生於信心熏
修邪見以爲福德是名邪法羅網纏心王言
大師以何等法名爲王論令諸小王依彼論
法治國理民是名如法能護衆生荅言大王
離諸顛倒貪欲之心離諸顛倒瞋恚之心離
諸顛倒愚癡之心依對治依實體依差別依
利益依對治依實體者對所治法所謂名爲

不貪善根不瞋善根不癡善根云何能起所
治法能治法所治法者謂放逸心及無慈心
能治法者謂行法行王不放逸心大慈悲心
知身無常資生無常善自觀身見諸過失能
如實知如是遠離受用資生行法行王雖得
自在不行非法如是名爲不放逸心大王當
知依王論法不應得物得不應取所應得非
時不取若依時節應得之物於貧窮人不逼
惱取至於險難賊難反逆難相害難如此難
時當起慈心不避危害護諸衆生於貧窮者
施與衣食於惡行者教以善法是名慈心大
王當知依此二法是則名爲行法行王正護

衆生不放逸心大慈悲心王言大師行法行
王有慈悲心云何而能治彼惡行諸衆生等
荅言大王行法行王若欲治彼惡行衆生先
起慈心智慧觀察思惟五法然後當治何等
爲五一者依實非不實二者依時非不時三
者依義非無義四者依柔軟語非麁獷語五
者依慈悲非瞋心王言大師云何依實非不
實荅言大王如法詰問取其自言依實過治
不依不實是名依實非不實王言大師云何
依時非不時荅言大王王有力時彼違王命
應治其罪若王無力應止不治是名依時非
不時王言大師云何依義非無義荅言大王

當問前人何心起罪若從惡心應如法治若
非惡心不應治罪是名依義非無義王言大
師云何柔軟非麤獷語荅言大王知此衆生
所犯王法但應呵責不合餘治應知其過正
說不隱善說苦言如是呵責非不呵責是名
軟語非麤獷語王言大師云何慈心非瞋心
荅言大王智者知此非但呵責斷此罪過除
却斷命不得割截手脚眼耳鼻舌依於大慈
大悲之心聽繫閉牢獄枷鎖打縛種種訶責
奪取資生駭擯他方爲令改悔非常惡心捨
此衆生是名慈心非瞋心王言大師行法行
王云何如是苦他衆生繫閉打縛駭擯他方

而復說言有慈悲心二法相違云何名爲行
法行王亦時大薩遮尼軋子告言大王如此
之義我今爲汝說於譬喻大王當知譬如父
母於惡行子爲念子故欲令改悔方便苦治
除不斷命不壞諸根餘打罵等隨心苦治不
名捨心不名惡心不名惱心以念子重爲令
改悔更不作故而彼父母不名非法名爲念
子不失慈心大王當知行法行王治諸一切
惡行衆生亦復如是慈心重故爲令改悔除
却斷命不壞諸根生大慈心起大悲心繫閉
打縛惡口訶罵奪其資生駡擯他方爲令改
悔捨惡從善亦令其餘念惡衆生不作非法

非常惡心捨此衆生亦不故心爲惱衆生而
行苦切如是名爲行法行王以慈悲心行惡
口等治罪衆生不名非法不失慈心是故二
行名雖有返而不相違王言大師何等是惡
行衆生荅言大王惡行衆生略說有五如是
應知何等爲五一者於王無利益衆生二者
逆共作無利益衆生三者起逆衆生四者邪
行衆生五者邪命衆生大王當知於王無利
益衆生有十一種何等十一者一者反逆衆生
二者教他反衆生三者與王毒藥衆生四者
奪王資生衆生五者破王所應作事衆生六
者侵奪王妻宮女衆生七者違王命衆生八

者出王密語衆生九者覘伺國土衆生十者
罵王衆生十一者毀訾王衆生如是等大王
當知是名於王無利益衆生大王當知遍共
作無利益衆生者有十種何等爲十一者遍
共相殺衆生二者遍相劫奪衆生三者遍相
侵妻衆生四者虛妄證他衆生五者虛妄誑
他衆生六者壞他親友衆生七者惡口罵他
衆生八者惡業斗秤欺誑損他衆生九者遍
相毀訾衆生十者遍相焚燒衆生大王當知
如是等名遍共作無利益衆生大王當知反
逆衆生者謂諸邊地城邑小王聚落主等不
臣根本大王教命如是名爲反逆衆生大王

當知邪行衆生者謂無戒衆生何等無戒所謂具足諸惡律儀屠兒獵師畜養猪羊雞犬鵝鴨猫狸鷹鷄釣射魚鼈造諸羅網火坑毒箭劫奪虫獸斷害他命自恣作惡如是名爲邪行衆生大王當知邪命衆生者所謂出家剃除鬚髮斷諸資生修無著行著諸種種異相衣服不護禁戒起種種見行諸異行種種方便求諸利養非法活命各各不能自法中任如是名爲邪命衆生

王言大師行法行王云何治彼五種衆生荅言大王行法行王治彼罪人不斷其命不行割截眼耳鼻舌手足身根有三種治法何等

三法一者訶責以爲治罪二者奪其所有資
生以爲治罪三者牢獄繫閉枷鎖打縛訶罵
駭擯以爲治罪隨彼五種作惡衆生上中下
罪三種法治是名行法行王治彼五種作惡
衆生王言大師行法行王云何治彼於王作
無利益衆生荅言大王如是罪人除不斷命
不壞諸根得繫閉牢獄枷鎖打縛奪其資生
駭擯他處以爲治罪大王當知如是名爲行
法行王治彼於王作無利益衆生之罪

王言大師行法行王云何治彼遮共作無利
益衆生荅言大王除不斷命不壞諸根得繫
閉牢獄枷鎖打縛不得全奪所有資生六分

之中奪其一分駢擯他處大王當知如是名
爲行法行王治彼遮共作無利益衆生之罪
王言大師行法行王云何治彼起逆衆生答
言大王行法行王先以善言如法開示若聞
王命即捨逆心請罪王所者王放大恩恕其
重罪依其國土王領之處不減不奪亦不駢
出何以故爲令知王有三種事故何等三事
一者有信二者有恩三者大力未降伏者爲
令降伏已降伏者令不更作欲反逆者令不
敢起大王當知彼有罪人得免其罪還伏王
位人民安隱彼如法王得福無量善名流布
若彼罪人聞大王命不肯伏罪當加重治不

得斷命不壞諸根盡奪資生國土人民駢擯
他處何以故為餘衆生不起逆故大王當知
如是名為行法行王治彼起逆衆生之罪
王言大師行法行王云何治彼邪行衆生答
言大王如是惡人不得斷命不壞諸根不得
駢擯不得奪其資生之物唯訶責治罪而作
是言若汝更作如是如是事者與汝重罪是
名行法行王治彼邪行衆生之罪王言大師
行法行王云何治彼邪命衆生答言大王應
當隨順如法僧衆大王當知若彼比丘破戒
邪見不依正法如實修行邪命自活者僧當
和合喚令現前取其自言彼若自引所作是

罪隨犯輕重當如法治若彼比丘拒違僧命
不從師友善知識語惱亂衆僧不得修道者
若彼國土是法王者僧當往語令王教勅順
從僧命尔時行法行王先應喚彼破戒比丘
善言勸喻令順僧命若其不從當集二衆現
前對實若得其罪助如法衆治彼比丘不得
斷命不得割截一切諸根不得囚閉不得枷
鎖不得搥打不得脫袈裟不得奪其資生之
物得訶責得駈擯大王當知若有二衆朋黨
諍訟依破戒依邪見依顛倒邪行依種種邪
命起種種異諍種種異說種種異語行法行
王若自知法若自知義應當如法斷彼諍事

若彼國王闇鈍無智不自知法不自知義不知正法不知邪法不知如法衆不知非法衆不知如法語不知非法語。爾時彼王應問國內大德沙門知法知義有大智慧常行正法利益衆生善知斷諍能如法語者。問其正法知犯非犯如是知已然後如法爲滅彼諍大王當知如是名爲行法行王治彼邪命衆生之罪。王言大師若彼國王闇鈍無智國內多諸沙門婆羅門所行各異互相是非各各自言我是沙門修正道者能利衆生我是福田應受供者如是各各互相是非云何得知是真沙門非真沙門是正道是邪道是如法語

非法語大王當知有大沙門釋迦子出家為
道得神通證有大名稱如來應正遍知彼諸
弟子比丘比丘及於彼瞿曇法中住者是真
沙門能行正道利益衆生是福田者能知正
法是如法語者大王當知除彼沙門瞿曇法
外餘諸一切婆羅門等是名邪道非實沙門
非法語者不應取語何以故大王當知彼無
正法云何能得如法之語

正言大師若彼國王闇鈍無智不知王論不
行正法自在作惡是國王罪誰應當治荅言
大王彼王自身自罪自治王言大師云何自
身而自治罪荅言大王彼王當依二法自治

何等二法一者依自力二者依他力依自力者彼王應當如是思惟我今所行爲是放逸爲非放逸爲有慈心爲無慈心爲是應作爲不應作爲是善業爲是惡業若知所作是不應作是惡業者即止不作生慚愧心悔過自責畏惡名稱畏墮惡道當依二法護惜自身何等二法一者放逸二者無慈悲心如是名爲依自智力自罪自治若王無智不能如是自思惟者應於國內處處求推有大智慧善知王論常行正法能如實語諸沙門等王應自往彼沙門所若不自往當遣大臣王子貴人人所重者詣彼沙門宣王渴仰尊重之心

將至王所若彼來者王應迎逆禮拜問訊盡
恭敬心盡尊重心問沙門言何等善行何等
惡行行何等法能有益行何等法無有利
益我心闇鈍無有智慧願爲我說時彼沙門
應當爲王廣說過去行法行王所行之法諸
王論法以柔軟語語彼王言如是如是應當
奉行有大利益謂十善法不殺生等如是如
是法不應行無有利益謂十惡法如殺生等
如是如是等是行法行王所行之法王今不
知應捨十惡等惡行法應行十善等善行法
聞已受持如法改悔若能如是名依外力自
罪自治王言大師行法行王云何護器世間

答言大王行法行王不焚燒不破壞不澆灌
是名護器世間行何以故一切皆是作不善
業是故行法行王不應焚燒破壞澆灌城邑
聚落山林川澤園觀宮殿莊嚴樓閣一切行
路及諸橋梁自然窟宅一切穀苴麻麥華果
草木叢林不應焚燒不應破壞不應澆灌不
應斫伐何以故以彼諸物皆共有命畜生等
有無不用者而彼衆生無有罪過不應損其
所受用物令生苦惱又彼一切外樹林等諸
善淨天一切鬼神皆悉共有於中受用屋舍
宮殿莊嚴樓觀諸天共住又彼園池屋舍宮
殿莊嚴樓觀一切水陸有命諸虫悉皆共用

所謂雀鼠雞狗鳩鴿鸚鵡象馬牛羊猫狸蛇
蝮鵝鴨魚鼈乃至一切微細諸虫所共受用
行法行王與諸衆生共依止此器世間活不
應破壞如是名爲行法行王護器世間安樂
衆生王言大師行法行王無量諸天侍從護
王天力自在能護於人云何而言人能護天
答言大王行法行王能與彼天正命淨食所
謂爲說如來正教甘露法門禪定解脫十善
道等令其得離諸惡道苦以是爲護除諸不
善殺生鬼等何以故攝在惡命自活衆生分
故是故行法行王即身能集無量功德資益
現在未來復能集諸善果大王當知行法行

王不應焚燒破壞除滅如來塔廟及諸沙門
淨行人等房舍屋宅資生之物園觀樓閣樹
林華果亦不應取亦不應伐除欲為利佛法
僧者王言大師行法行王所有臣佐宰官禁
司不憂國計但求利己或從私忿以害公政
或受貨財以枉治道增長百姓遮相欺亂以
強凌弱以貴輕賤以富欺貧以曲枉直富者
獲申貧者受屈諂佞宰政忠賢隱退或時在
朝懼危自默或行求財貨用安自己百姓貧
苦不堪充濟猷苦思亂不聞王命斯由臣吏
不行忠節欺上亂下冒受王祿如是之人攝
在何等衆生數中答言大王如是惡人攝在

劫奪衆生數中上品治罪何以故大王當知
以其受王名官重祿捨公念私不存公政禍
亂之生莫不由之此是國之最大惡賊王是
法王不得斷命是故攝在劫奪數中上品治罪
王言大師行法行王國內若有不孝衆生不
念父母生養之恩捨背父母與妻子居所有
衣食病瘦湯藥念給妻子不與父母父母衰
老出入無力曾不生憂親近扶持於其妻子
晝夜不離得一美味不敢自噉持與妻子或
偷父母所有財寶私共妻子歡樂食噉父母
善言不肯隨順妻子惡語信用無捨或爲妻
子訶罵父母或共親族母女姊妹尊卑上下

行於姪欲無慚愧心如是一衆生攝在何等衆
生數中答言大王如是惡人攝在劫奪衆生
數中上品治罪何以故大王如是惡人當知
父母恩重至心孝養猶不能報何況棄捨違
逆教命是名世間最大劫賊王言大師行法
行王國內有人放逸無慈於其妻子奴婢眷
屬能行不忍非法馳使非時馳使不應作者
強逼令作至於打罵無過能行衣食不充眠
卧無所喚不及應走則嫌遲出言常罵如似
怨家如是之人攝在何等衆生分中答言大
王攝在邪行衆生分中中品治罪何以故大
王當知居家資生奴婢共報有其半分自分

衣食恣意著噉奴婢之分護惜不與設令給
與不依時節應多與少常令不足是名世間
最大邪行王言大師行法行王國內有人於
佛法僧作不利益焚燒破壞塔寺形像及諸
經書惡言毀訾言造作者無有福利其供養
者虛損現在無益未來或嫌塔寺及諸形像
妨礙處所破壞除滅送置餘處或破沙門淨
行人等房舍窟宅或取佛物法物僧物園林
田宅象馬車牛驢騾駱駝奴婢僮僕衣服飲
食金銀瑠璃碑磔馬碣一切珍寶或捉沙門
策役駡使責其發調罷令還俗或時輕心弄
諸沙門欲爲戲笑不備時供虛誑請喚不與

飲食設與飲食不及時節與非法食或時輕賤
毀訾罵詈惡言誹謗或以杖木土塊瓦石及自
手拳打諸沙門或捉刀槊弓箭矛戟斫射傷害
或推水中或推火中或推山澗坑陷之中或
放象馬虎狼師子惡狗毒獸傷害其身如是
惡人攝在何等衆生分中答言大王如是惡
人攝在惡逆衆生分中上品治罪何以故以
作根本極重罪故王言大師何者根本罪答
言大王有五種名爲根本何等爲五一者破
壞塔寺焚燒經像或取佛物法物僧物若教
人作見作助喜是名第一根本重罪若謗聲
聞辟支佛法及大乘法毀訾留難隱蔽覆藏

是名第二根本重罪若有沙門信心出家剃
除鬚髮身著染衣或有持戒或不持戒繫閉
牢獄枷鎖打縛策役駢使責諸發調或脫袈
裟逼令還俗或斷其命是名第三根本重罪
於五逆中若作一業是名第四根本重罪謗
無一切善惡業報長夜常行十不善業不畏
後世自作教人堅任不捨是名第五根本重
罪大王當知若犯如是根本重罪而不自悔
決定燒滅一切善根趣大地獄受無間苦大
王當知以王國內行此不善極重業故梵行
羅漢諸仙聖人出國而去諸天悲泣一切善
鬼大力諸神不護其國大臣相殺輔相爭競

四方逆賊一時俱起天王不下龍王隱伏水
旱不調風雨失時諸龍皆去泉流河池悉皆
枯涸草木焦然五穀不熟人民飢餓劫賊縱
橫遞相食噉白骨滿野疫癘疾病死亡無數
時諸人民不知自思所作是過而怨諸天訐
諸鬼神是故行法行王爲救此苦行治罪法
王言大師行法行王若無染心無惡心者何
故不得慈心斷命割截諸根荅言大王行法
行王以無染心無惡心故不能得起如是心
念斷衆生命割截諸根何以故彼法行王見
彼衆生至於死時依自業過生瞋恨心死已
命斷生惡道中惡心隨逐長夜不斷是故行

法行王不行斷命不壞諸根何以故此事難
故若斷其命割截諸根一作已後不可救故
繫閉枷鎖打縛訶罵等非永棄捨是故佛聽
行法行王爲護衆生若斷其命割截諸根不
名滿足護衆生者大王當知斷衆生命割截
諸根最是世間大怖畏事故佛不聽行法行
王作如是事王言大師行法行王國內人民
所應輸王課調物者爲是王物爲是他物答
言大王非王自物亦非他物何以故他自手
力能作能得是故非王自己有物非他物者
以王能護彼衆生故是故非是一向他物彼
衆生等立如是法是故輸王王應得分非是

他物王言大師行法行王若有人民應輸王物而不輸王彼民爲是偷盜王物爲非偷盜荅言大王非偷王物彼民貪惜欺王不輸得無量罪何以故以應輸物不輸王故王言大師於王國內合輸物者而不肯輸然王即行鞭杖打責若取彼物爲是劫奪爲非劫奪荅

言大王非是劫奪何以故大王當知以王有力能護其難彼由王護得安自業應輸王物故非劫奪王言大師若貧窮人應輸王物以無物故強加鞭打而責其物爲是劫奪爲非劫奪荅言大王有人邊是劫奪有人邊非劫奪有人邊非劫奪者彼人若是竄墮懈怠不

勤家業非法邪姪擄蒲碁博如是等戲輸他財物致貧窮者如是人邊行法行王鞭打徵責乃至他邊貨物輸王王非劫奪何以故王作是念爲令彼人更不敢作非法之事損失財物故如是王民二俱有益王得益者庫藏滿足民得益者資生成就又得無罪故王言大師何等人邊王是劫奪大王當知王雖合得若知彼人所有家業爲賊劫奪詐親人奪非法王奪失火焚燒暴風疾雨飛沙雹石壞其家業或時住處不得安隱人民走散失沒家生或有虫螟雀鼠鸚鵡噉傷五穀或時復值天旱不熟水潦不收如是等緣家業不立

資生壞盡於此人邊應當默然不應徵責若
取此物名爲劫奪何以故以不慈愍此貧窮
人不名具足護衆生故大王當知我爲此事
說一譬喻智者於中以喻得解譬如有人欲
以飲食供養沙門淨行人等備具種種一切
美味其家忽然失火焚燒風吹水漂賊所劫
奪飲食都盡或爲不淨惡物所汙不住食噉
諸沙門等食時旣至到施主家見其損失反
助憂苦乞食來與何心敢責施主飲食然彼
施主不與飲食亦無有罪大王當知行法行
王亦復如是王雖合得彼人不與不犯王法
不合打責如是行法行王在世治化民常願樂

